



Broj: 04/5-50-15-134/15  
Sarajevo, 11.5.2015.

**Predmet:** Izvještaj sa 88. Rose-Roth seminara Parlamentarne skupštine NATO-a, održanog u Beogradu, od 31.3. do 2. 4. 2015.

U radu 88. Rose-Roth seminara PSNATO-a, koji su organizirali PSNATO-a i Narodna skupština Republike Srbije od 31.3. do 2.4.2015. učestvovali su: Nikola Lovrinović, predsjedavajući, Asim Sarajlić i Dušanka Majkić, članovi Delegacije Parlamentarne skupštine BiH u Parlamentarnoj skupštini NATO-a.

Seminar o temi „Srbija, Zapadni Balkan i euroatlantska zajednica“ održan je u sedam sesija:

- Srbija u euroatlantskoj zajednici
- Zapadni Balkan i euroatlantske integracije
- Regionalna saradnja na Zapadnom Balkanu
- Strani borci na Bliskom istoku i na Sjeveru Afrike: zajednički izazov
- Borba protiv korupcije i organiziranog kriminala na Zapadnom Balkanu
- Reforme menadžmenta odbrane i izgradnja integriteta
- Briselski dijalog između Beograd i Prištine: put naprijed

Tokom uvodne sesije učesnicima seminara obratili su se prvi potpredsjednik Vlade Srbije Ivica Dačić, potpredsjednik Narodne skupštine Srbije Igor Bečić i potpredsjednik PSNATO-a Paolo Alli.

Ivica Dačić naglasio je da je Srbija čvrsto izabrala put evropskih integracija te da je njen strateški izbor da postane pouzdan, odgovoran i predvidljiv partner. Članovi delegacije Narodne skupštine Republike Srbije u PSNATO-a su u uvodnom dijelu istaknuli opredijeljenost Srbije za daljnje poboljšanje i proširenje saradnje sa NATO-om, posebno u okviru IPAP-a (Individualnog akcionog partnerskog plana), koji su nedavno potpisali i usvojili nadležni državni organi.

Tokom prvog dana zasjedanja razgovarano je o odnosima Srbije i euroatlantske zajednice, u kojima su uvodna izlaganja imali državni sekretar u Ministarstvu odbrane Republike Srbije Zoran Đorđević i državni sekretar u Ministarstvu vanjskih poslova Republike Srbije Roksanda Ninčić.

Uvodničari i govornici podcrtali su značaj potpisivanja IPAP- a, programa NATO-a za odnose Srbije i NATO-a gdje je potpuno jasno da se ozbiljno pristupilo izgradnji potrebnih standarda. Isto tako, naglašen je veliki doprinos Srbije u misijama Evropske unije i Ujedinjenih naroda.

Međunarodna uloga Srbije postala je vrlo istaknuta činjenicom da ona predsjedava OSCE-om, što značajno utiče i na region.

Tokom druge sesije o temi: „Zapadni Balkan i euroatlantske integracije“ razgovarano je o aktuelnom statusu zemalja Zapadnog Balkana na putu ka euroatlantskim integracijama. Tokom rasprave konstatiran je određeni napredak u sadašnjem stanju ekonomskih prilika u regionu što bi mogao biti dobar znak za daljnji put ka euroatlantskim integracijama.

Od zemalja Zapadnog Balkana očekuje se da intenziviraju reforme i da što prije dorade strateške nacionalne dokumente, kao što su politike vanjskih poslova, odbrambena i sigurnosna politika. Naime, da ih prilagode vremenu u kojem se živi.

Regionalna saradnja na Zapadnom Balkanu bila je predmet rasprave tokom treće sesije. Svi učesnici u raspravi istaknuli su u više navrata saradnju u oblasti energetike, investicija, sigurnosti. Konstatirano je da nema alternative regionalnoj saradnji u kojoj je bitna pragmatičnost, a ne emocije. Poboljšanje ekonomskih uslova za stanovništvo bit će glavni podsticaj za daljnju ekonomsku saradnju.

Četvrta sesija o temi: „Strani borci na Bliskom istoku i na sjeveru Afrike“ potvrdila je opredjeljenje da je to zajednički izazov. Povratnici s ratišta iz Sirije i sjeverne Afrike su univerzalna prijetnja i sigurnosni izazov koji je u vrhu prioriteta država Zapadnog Balkana. Konstatirano je da je zakonodavna vlast u regionu brzo reagirala donošenjem adekvatnih zakona kojima će se sankcionirati odlazak boraca na strana ratišta, ali da su preventiva, provođenje zakona i saradnja nadležnih obavještajnih i sigurnosnih agencija nužnost. Razmjena informacija, međusobno povjerenje i odgovornost nadležnih državnih institucija su obaveza o kojoj treba razgovarati na svim nivoima.

Srbijanski ministar unutrašnjih poslova Nebojša Stefanović je tokom pete sesije, koja je bila posvećena raspravi o borbi protiv korupcije i organiziranog kriminala na Zapadnom Balkanu, naglasio da je Srbija pokazala odlučnost i jaku političku volju u borbi protiv korupcije. Konstatirano je da su sve zemlje Zapadnog Balkana deklarativno u otvorenom sukobu s nosiocima organiziranog kriminala, ali da rezultati nisu isti i na isti način prepoznatljivi. Dobro je da je prekogranična saradnja u ovim aktivnostima više nego dobra i da se očekuju još bolji rezultati. Svakako, polje djelovanja je izbor zemalja pojedinačno, a za region je potrebna koordinacija, veća odgovornost sektora sigurnosti gdje će prevencija i jasan pravni okvir biti više nego prepoznatljivi.

U raspravi o reformi menadžmenta odbrane i izgradnji integriteta konstatirano je da su priuštiva struktura budžeta za odbranu, transparentnost u javnim nabavkama, educiran i motiviran personal najbitnije karike u izgradnji integriteta odbrane. Naime, izgradnja integriteta je najbolji vid i mehanizam prevencije. Srbija izdvaja oko 1,50 % GDP-a za potrebe odbrane i na dobrom je putu da strukturu budžeta za odbranu usaglasi i postigne omjer koji je u skladu s važećim standardima. Analiza nivoa rizika korupcije u sektoru odbrane je usko povezana s prevencijom i rezultati ne izostaju. Interne kontrole, transparentnost u nabavkama i realna analiza potreba najbitnije su karike u izgradnji integriteta, konstatirali su eksperti, uvodničari i učesnici u raspravi.

Sesija u kojoj je razgovarano o „Briselskom dijalogu“ Beograda i Prištine pokazala je da je u toku novi zamah i napredak. Stručnjaci i političari tvrde da se nedavno održani regionalni sastanak ministara vanjskih poslova i saobraćaja, uz učešće relevantnih ministara iz Vlade Republike Srbije, pokazao kao dobar model za budućnost. Problemi su izraženi u oblasti pravosuđa i lokalne uprave te u vezi s inicijativom o formiranju oružanih snaga Kosova i definiranju njihove eventualne namjene.

Inače, na trodnevnom seminaru okupilo se više od 200 učesnika, uključujući 80-ak članova parlamenata iz 23 zemlje članice i partnera, koji su razgovarali o euroatlantskim integracijama i demokratskoj konsolidaciji Zapadnog Balkana

Izvještaj sačinio:  
sekretar Delegacije  
Željko Grubešić

PREDSJEDAVAJUĆI DELEGACIJE  
Nikola Lovrinović